

父母，是否俱屬知情，未據查訊明確。如果女家止有劉德一人，既經允賣，自難仍給領回，或尚有父母及別項尊屬不知賣休情事，亦未便以劉德知情之故，即擬當官嫁賣。職等詳加酌議，所有賣休之劉氏似應行令該撫查明有無父母，是否知情賣休之處，分別歸宗官賣。奉批照辦。乾隆六十年說帖

眉批：姦婦無宗可歸，仍給縱姦本夫領回。道光元年蘇撫咨石周氏案

### 無奈賣休免追財禮並免離異

河撫 咨：王黑狗將妻扈氏賣與李存敬為妻，訊因貧病無奈，與無故賣休者有間。扈氏母家並無親屬，若照律離異，勢又失節。衡情酌斷，扈氏仍交後夫李存敬領回完聚。王黑狗得過財禮錢文並請免追。嘉慶二十三年案

### 縱姦被人強占姦婦免其離異

提督 咨送屈大姦占陳張氏一案。除屈大照強占擬流外，其張氏係本夫陳五縱容與人通姦，例應離異。惟陳五縱妻犯姦，係畏姦夫強暴，情固出於勉強。並據陳五供稱，如僅將子女給伊領回，伊係隻身，窮苦不能撫養，子女幼小，將來必至失所，情亦可憫。原情酌斷，應將張氏並子女俱給陳五領回完聚。嘉慶二十二年福建司現審案

眉批：捏稱夫亡嫁賣，後夫不知情不坐罪，與雇妻女條趙成都案

### 捏稱夫亡將妻賣與人為妾

北城察院 移送：秋桂原係王保之妻，因貧商同妻父賣休，捏稱夫亡賣給潘壽林為妾。後潘壽林詢知情由，旋經正妻責打私逃。將王保、潘壽林、秋桂均照賣休買休律各杖一百。嘉慶十九年四川司

在蒙古地方搶奪蒙古女子例無明文，應照依刑律辦理，並聲明王連登聽從搶奪，下手搶出，負至中途姦污，未便照為從問擬，將王連登依聚衆夥搶犯姦婦女已成為首例發回城為奴，尚屬允協，惟此例現已改發雲貴、兩廣極邊烟瘴充軍，應即更正，並將右面改刺“改發”二字。道光六年直隸司說帖

### 縱姦致被強占本夫情急妄告

江督 奏：周泳太先與孫幗柱之妻傅氏通姦，係孫幗柱縱容，孫幗柱因其不能多給錢文，屢次爭鬧，控縣傳訊，孫幗柱因係縱姦不敢到案，旋即外出，迨後回家，周泳太與傅氏不肯留住，孫幗柱懷忿即誣告周泳太習教謀逆，惟孫幗柱誣累多人係由周泳太姦占其妻所致，將周泳太於強搶犯姦婦女已成遺罪上量減一等擬以滿徒。嘉慶十八年安徽司案

### 搶賣有夫改嫁之婦並非夥衆

東撫 咨：外結徒犯內張氏因夫張兆林外出，起意改嫁，以致被姑老張氏賣與張殿為妾，張兆林告官斷回，既隳其節復失其身，實與姦犯之婦無別，魏山與賈榮將其搶賣僅止二人，並非夥衆，係在逃之賈榮為首，獲日應比照搶奪犯姦婦女量減問擬滿徒，魏山係為從，再減一等杖九十徒二年半。嘉慶二十五年案

### 通姦被控藏匿姦婦意圖霸留

蘇撫 咨：郭鏞與陳許氏通姦敗露，先經焦泰運等私和寢息，後郭鏞復與續舊，被許氏夫祖陳銓聞知指控，該犯輒令焦泰運將許氏送藏王卜五家一月之久，顯係有意霸留，雖訊無恃勢強奪情事，其串囑藏匿情同姦占，應將郭鏞於強奪良家妻女姦占為妻妾候